

**Tiroma Leta  
Paul Mo Ulia Isan  
Timothy  
Leta Nike**

Timothy mo lo usuri Paul na nona voko (Rom 16.21; 1Co 16.10; Php 2.19) mata nora rasua hin Iesu. Paul mo hitea sohena natuna matea (1.2). Timothy mo mai patu tamlohi na nona rani peresi Paul, enia tapalan Paul. Paul mo sohai leta sei isan Timothy, pani vujangi hinia mo tueni na mauri vao kalesia non God. Mo vujangi na malele tata-holo vara řa viřoni na patu tamlohi hinia, deacon la vai na vavahinau non God (3.1–7; 8–13; 5.17–20).

Reti non Paul akerihi řa eři rasua tarea:

‘Reti nike, o eři rasua ale mo tataholo vara o lavi vevuhia, vara, ‘Křisto Iesu mo mai na varama vara i juri na tamlohi hehe.’ Enau na sasati jea hinira. Pani God mo řomopoiiau matan hinia sei, matan enau na sasati jea hinira, ale Iesu Křisto mo tauau vara a mai tovongi matea vara i vujangi na nona řomperavu isan la haratu la pa rasua mata mauri tui.’ (1.15–16)

**Hin Leta Nike**

1. Retioloolo (1.1–2)
2. Retivujangi mata mauri kalesia (1.3–3.13)
3. Hina aulu na nořa lotu (3.14–4.5)
4. Paul mo retituetueni Timothy (4.6–6.21)

*Reti Tiroma*

<sup>1</sup> Enau Paul, vahařule matea non Křisto Iesu God mo viřoniau na nona suiha, Křisto Iesu nořa Jujuri enia nořa řomtoho. <sup>2</sup> Timothy, natuku hin

noña mauri rasua, na lo usiusi matam vara God Tamaña enia Křisto Iesu noña Moli, la sileho na řomřuhu, na řomopoia peresi na tamata.

*Retiřoařoahai Mata Vujangi Haluhalu*

<sup>3</sup> Sohen na vereā řilangi isam hin rani atu na tauho Ephesus vara a vano Macedonia, na vereā vara o pa toho vara o sile na reti isan la tamlohi atu vara la sopo vujangi te vujangi tinapua, <sup>4</sup> teni vara la sopo usuri te sorasora halu teni te sorasora vono mata sava pina tuai la tataholo hinira, vuana enia řomřomi vono purongo, la hinau sei la sopo tueni te tamlohi na mauri mata rasua hin God. <sup>5</sup> Pani noña řomřomi tavera hinia, enia opoia, opoia mo tai isana mapu vokevoke peresi na rongovosahi na hinau tataholo, peresi na rasua varařuhu. <sup>6</sup> Tamlohi hai, la jalio, la posi la usuri na sorasora vono, <sup>7</sup> la opoia vara la mai tamlohi vujangi mata leu, pani la sopo levosahi na sava la lo vereā teni na hinau sei la vereā vara la levosahira mo řuhu vara la tataholo teni mo vono.

<sup>8</sup> Ale řa levosahia vara Leu mo řuhu, pani vara tea mo lavia na posposi tataholo purongo, <sup>9</sup> ha levosahi harihi: God mo sopo sile na leu mata tamlohi tataholo, pani isan la haratu la lo vaivaileu, la haratu la sopo ololo hin te tamlohi hatea, la haratu la lo usuri na posposi varama, la haratu la lo hehe, la haratu la sopo sile na ololo isan te hinau mata ololo, la haratu la lo vilimatei na tamara teni tinara, la haratu la lo vilimatei na tamlohi tinapua, <sup>10</sup> ale la haratu la lo vai na posposi lumiha, tamlohi la vaivaileu peresi na tamlohi, hařai la vaivaileu peresi na hařai, la haratu la lo tauri vanaho na tamlohi mata la hařehira, ale la

haratu la lo retihalu tarea, la haratu la lo taviti halu na lolo court, ale na posposi lejileji tari sei la lo turuleji na vujangi řuhu sei, <sup>11</sup> mo lo usuri na Retiřuhu řuhuřuhu non God sei enia avulahi tavera, ale Retiřuhu sei mo taua isaku.

<sup>12</sup> Na vere meje isan Křisto Iesu nořa Moli, mo sile na řilařilangi isaku, matan mo hitea sohena vara a eři vai na masalona, ale mo viřoniau vara a volitusi isana, <sup>13</sup> hina purongo vara tiroma na lo verelejleji Křisto, na lo unuhi na nona tamlohi vara a komora, ale na kerekerera, pani God mo řomopoiāu mata na sopo lo levosahi na sava na lo vaia matan na sopo rasua, <sup>14</sup> Ale řomřuhu non nořa Moli mo mařivi savulevule matakū na rasua peresi na opoia hin Křisto Iesu. <sup>15</sup> Reti nike, o eři rasua mo tataholo vara o lavi vevuhia vara: Křisto Iesu mo mai na varama vara i juri na tamlohi hehe. Enau na sasati jea hinira. <sup>16</sup> Pani God mo řomopoiāu matan hināu sei, matan enau na sasati jea hinira, ale Iesu Křisto mo tauau vara a mai tovongi matea vara i vujangi na nona řomperavu isan la haratu la pa rasua mata mauri tui. <sup>17</sup> Nake, isan Supe mata tauni tari, i sopo eři tihai, tea i sopo eři hitea, enia God matelete, řa pa silea na oloolo tavera peresi na hasohaso na rani tui tui tarea. Amen.

### *Vavahinau Non Timothy*

<sup>18</sup> Timothy natuku, reti nike na lo vereā isam, mo lo usuri na retimangovi sei la vereā matam moiso, la pa tueniho vara o eři vai na vuro řuhu, <sup>19</sup> tarea o tauri řilangi na nom rasua peresi na nom rongovosahi na hināu mo tataholo, ale tamlohi hai la tau nařihira, la komo na nora rasua sohena

boti mo vujahi kosahia na paranga. <sup>20</sup> Tatuara sei, Hymenaeus enia Alexander, enau na taura la vano na liman Setan vara i pa vujangira vara la pa sopo mele turuleji hin God na nora vujangi haluhalu.

## 2

### *Vujangi Mata Lotu*

<sup>1</sup> Tiroma, na lo vere a řilangi vara tamlohi na nora usiusi mata tamlohi tari, la usi God mata tuetueni, la usiusi mata tinapua, ale vara la vere meje isan God. <sup>2</sup> Mata supe peresi la haratu sei la lo tauri na suiha, matan vara řa pa eři mauri na mauri mo tamata, ale mo malum vara řa eři usuri na mauri tataholo, ale řa sile na oloolo isan God. <sup>3</sup> Usiusi sohena, mo řuhu na nahon God, nořa Jujuri, ale mo avulahi hinia, <sup>4</sup> matan God mo opoia vara i juri na tamlohi tari, ale vara la pa levosahi na retivarařuhu.

<sup>5</sup> Matan God enia matelete purongo, ale tamlohi tuetueni matelete purongo sei enia mo malele tamlohi la mai isan God, tamlohi atu enia Křisto Iesu, <sup>6</sup> mo hase silea sohena volituhu mata tamlohi tari, reti sei enia vereulia sei God mo silea na rani tataholo.

<sup>7</sup> Matana, God mo viřoniau vara a mai vahařule matea, ale vara a mai tamlohi retivujavujangi matea, na lo vere na varařuhu na sopo halu, God mo řuleau vara a vujangi na tamlohi řořoha na malele rasua peresi na retivarařuhu.

### *Posposi Mata Hařai*

<sup>8</sup> Moiso, na opoia vara tamlohi na jara tari la usiusi, ale la tahe na limara tapu isan God, i pa

sopo te lolokoru teni vasvas hinira. <sup>9</sup> Sohena, na opoia vara tarea haʻrai la ruru na ruru na řomřomi řuhu i tataholo na naho tamlohi. Mo řuhu vara la sopo peri na vulura na malele tinatinapua peresi na hinau mata gold teni huřutavila teni ruru volina mo sahe aulu jea, <sup>10</sup> pani hin haratu purongo, mo tataholo mata haʻrai sei mo lo vereea vara enia mo lo usuri posposi atu God mo opoia, peresi na vavahinau řuhu. <sup>11</sup> Haʻrai la pa toho malum la tapurongo, ale la tatamahu vara la oloolo matan vara la eři lelevosahi. <sup>12</sup> Tarea, enau na sopo majinga vara haʻrai la vujangi teni la mai patu tamlohi la tiroma la aulu na tamlohi. Mo vono, enira la pa toho malum purongo, <sup>13</sup> matan God mo vai Adam tiroma moiso mo pa vai Eve.

*Gen 2.7, 21-22*

<sup>14</sup> Ale Tiapolo mo sopo halu Adam, mo halu na haʻrai, ale mo tope na retileu non God. *Gen 3.1-6*

<sup>15</sup> Pani God i pa juri na haʻrai na tapetape, vara la lo turu řilangi na rasua, opoia, la hahau na mauri vokevoke peresi na posposi hasera taurilatira.

### 3

#### *Patu Tamlohi Na Vao Kalesia*

<sup>1</sup> Reti nike o eři rasua, vara tea mo tau na řomina vara i pa patu tamlohi rasua matea mata tamlohi rasua, mo opoi na vavahinau řuhu matea.\*

<sup>2</sup> Ale matana, o kilau vara mo sopo te hinau na maurina, mo lahi na haʻrai matelete, mo hase taurilatia, enia tamlohi řomřomi, o hitea vara

---

\* **3:1:** patu tamlohi rasua: řaramin reti sei, patu tamlohi enia tamlohi atu mo lo kilau na tamlohi rasua na jara matea.

tamlohi la lo sile na oloolo isana moiso, enia mo avulahi vara i lavi na tamlohi tinapua na imana, ale enia mo levosahi na posposi mata vujangi mo řuhu,<sup>3</sup> Ale, enia mo sopo tamlohi inu hajavua, mo sopo tamlohi valum, pani řomina mo malum, mo sopo tamlohi vasvas, ale mo sopo tamlohi řomjea na mania,<sup>4</sup> ale mo lo kilau mamahuni na lolo imana, ale natuna la sile na oloolo isana, ale la oloolo hinia.<sup>5</sup> Matan vara tea mo sopo eři kilau mamahuni na imana, i pa kilau mamahuni na vao kalesia non God sohena sava?<sup>6</sup> Enia i pa sopo tamlohi matea mo pa mai purongo na mauri kalesia, matan patuna i pa sosohi na mangisi tavera, ale i jovi sivo na talai non Tiapolo.<sup>7</sup> Moiso aulu hin haratu, tamlohi na jingoima la vereva vara maurina mo tatahola, ale matan i sopo eři jovi hin te vuna non Tiapolo, ale i mahanuhanu matana.

### *Malele Viřoni Na Deacon*

<sup>8</sup> Deacon sohena, o hitea vara tamlohi la lo sile na oloolo isara moiso, ale enira la sopo meme masanga, la sopo tamlohi inu hajavua, la sopo řomtutuni na mania.<sup>9</sup> Ale la tauri řilangi na hinau luhu mata rasua na posposi sei tarea řomira la tatahola na nahon God.<sup>10</sup> Ale o vaihitera tiroma vara ko sopo hite te hinau na maurira, ale o pa majinga hinira vara la volitusi sohena deacon.

### *Hařai Deacon*

<sup>11</sup> Hařai sohena, vara la deacon, o hitea vara tamlohi la lo sile na oloolo isara moiso, la sopo sorasora tamlohi, la lo hase taurilatira, tarea la lo usuri na masalon God na hinau tari la lo vaira.†

† **3:11:** hařai: hai la vereva vara hařai mo opoia vara i mai deacon, teni narou deacon.

<sup>12</sup> Deacon la lahi na haʻrai matelete, la lo kilau mamahuni na natura peresi na imara.‡ <sup>13</sup> Matan la haratu la lo volitusi ʻŕuhu sohena deacon la pa lavi na hija ʻŕuhu nora, ale la pa lavi na ʻromʻŕilangi na nora rasua hin Kʻristo Iesu.

### *Posposi Tataholo Na Vao Kalesia*

<sup>14</sup> La hinau sei na lo ulia isam, na lo ʻromtoho vara a pa vano isam vila, <sup>15</sup> pani vara te hinau mo tauriau, leta nike i pa tueniho vara o levosahi na posposi mo tataholo na vaon God. Vaona enia vao kalesia non God mauri, vao kalesia enia peri, ale enia lapiti retivaraʻŕuhu. <sup>16</sup> Hina tavera matea kama taviti hinia, pulo noʻra rasua enia hina luhu matea:

Kʻristo, mo pala mo mai tamlohi,  
 Tanume Tapu mo vujangia vara enia natu  
 Kʻristo,  
 angelo la hitea,  
 ale tamlohi la vereulia na mara jara tinatina-  
 pua tari,  
 moiso tamlohi na varama la rasua,  
 ale God mo lavia mo sahe aulu na hasohaso na  
 tuka.’

## 4

### *Vujangi Nona Tanume Sasati*

<sup>1</sup> Pani, Tanumen God mo vere mamahunia vara na pongi hitahu tamlohi hai la pa vahaʻri na malele rasua matan la pa tapurongo isana tanume haluhalu peresi na vujangi non tanume sasati, <sup>2</sup> ale retihaluhalu sei la pa tai isana tamlohi tapnetano, ʻromira la sulimateira, ale la sopo mele

---

‡ **3:12:** haʻrai matea: mo sopo tipahi na narouna hin te rani.

levosahia vara sava mo tataholo, <sup>3</sup> ale enira la tapuhoro na lahi, moiso la horo na tatua hanhani sei God mo vaira matan vara la haratu la rasua la levosahi na retivaraŕuhu la pa lavira na vere meje, <sup>4</sup> matan hinau tari God mo vaira la ŕuhu, ale mo sopo te hinau vara tamlohi la ŕohu hinia vara la lavia la vere meje matana moiso, <sup>5</sup> matan reti non God peresi na usiusi mo lo vai na hanhani la ŕuhu na nahon God.

*Paul Mo Retituetueni Timothy*

<sup>6</sup> Vara o vujangi la hinau sei isana vorai peresi na vevorai, o pa volitusi ŕuhu non Kŕisto Iesu, matan ko hase vahaniho na Retiŕuhu peresi na vujangi ŕuhu sei ko lo usuria. <sup>7</sup> Pani o toho asau na sorasora vono la rongorongo vono, ale o hase vujangiho na posposi sei God mo opoia, <sup>8</sup> matan ŕa levosahia vara, vara ko vai na epem mo ŕilangi, haratu mo ŕuhu makomona purongo, pani vara tarea o lo usuri na posposi God mo opoia, i pa ŕuhu jea na maurim tari, mo ŕuhu mata maurin nake peresi na mauri atu i pa mai hitahu. <sup>9</sup> Reti nike o eŕi rasua, ale mo tataholo vara tamlohi la pa usuri vevuhia. <sup>10</sup> Matan harihi, ŕa lo tau na ŕomiŕa mo ŕilangi na vavahinau matana, ŕa ŕomtoho hin God sei mo mauri, enia Jujuri nona tamlohi tari, pani isan la haratu la rasua enia mo Jujuri varaŕuhu.\*

<sup>11</sup> O retileu, ale vujangi na hinau nike. <sup>12</sup> O sopo tinaŕihia vara tamlohi la hitesatihio matan ko uluvou purongo, pani tarea o vai na tovongi

---

\* **4:10:** reti sei: God enia Jujuri nona tamlohi tari mata enia hasena i pa eŕi juri na tamlohi, pani i pa sopo tamlohi tari la pa mauri matan la pa sopo rasua, pani isan la haratu la rasu God nora Jujuri, enira la pa mauri.



řuhu isana tamlohi rasua na nom retireti, na nom vavahinau, na nom opoia, na nom rasua peresi na nom posposi vokevoke. <sup>13</sup> Ale i pa tikeli na rani a mai isam, o lo tau na řomim vara tarea o lo evievi na Retitapu na naho tamlohi rasua, o lo vere mamahunira na malele tari mata mauri rasua, ale o lo vujangi na retivarařuhu. <sup>14</sup> O sopo řompurongo hin nom silesilea atu God mo silea isam na retimangovi atu hin rani atu la patu tamlohi rasua na vao kalesia la ususi la tau na limara na patum.† <sup>15</sup> Tarea o lo hahau usuri la vujangi atu, o tau vevuhi na řomim hinira matan vara tamlohi la pa hitea vara ko lo ulua na mauri rasua. <sup>16</sup> O hase kilauho, o kilau mamahuni sava ko lo vujangia. O turu řilangi hin la hinau sei matan vara o vaia o pa eři juriho peresi la haratu la lo tapurongo isam.

## 5

### *Vavahinau Nona Patu Tamlohi Rasua*

<sup>1</sup> O sopo hapuhi na tamlohi taunina mo jeu na taunim, pani o usia i řilangi isana sohen ko lo vaia isan tamam, ale o retireti isan la haratu taunira mo sopo lo jeu na taunim sohena tasim. <sup>2</sup> Isana hařai taunira la jeu na taunim, o retireti isara sohen ko lo retireti i řuhu isan tinam, ale o retireti i řuhu isana hařai taunira la sopo jeu na taunim sohena vetasim, ale o sopo sile na masapa isam hasem mata o řomlumihā hinira.

### *Ha Lo Kilau Na Hařai Malepu*

---

† **4:14:** patu tamlohi rasua: la posia mo tinapua sohen harihi: patu tamlohi, elda teni bishop. O hite: 5.17, 19

<sup>3</sup> O sile na oloolo isana haʻai malepu la haratu la haʻai malepu varaʻuhu, harasei mo sopo te tinapua vara la pa lo kilaura. <sup>4</sup> Pani vara te haʻai malepu te natura teni nona vajiaha mo lo toho, mo ʻuhu vara enira la vujangi na nora rasu na vavahinau mata la kilaua sohen haʻai atu mo lo tapna kilaura tiroma, matan God mo avulahi hin posposi sei. <sup>5</sup> Haʻai malepu varaʻuhu mo sohen harihi, mo lo toho hasena, ale enia matea mo tau na ʻomina isan God tarea, ale posina enia mata usiusi mata tuetueni na rani teni na vutepongi, <sup>6</sup> pani vara te haʻai malepu mo lo ʻomʻomia enia hasena, mo lo mauri, pani mo mate moiso. <sup>7</sup> O ritehu hin la hinau nike isara matan i pa sopo te masapa vara tamlohi la pa pisuhira. <sup>8</sup> Pani vara tea mo sopo kilau na tahisana, ale aulu hin haratu, mo sopo kilau la haratu na lolo imana, mo vahaʻi na posposi rasua, posina sei mo sati mo jeu la haratu la sopo rasu God.

<sup>9</sup> O tau na hija haʻai matea na pepa sei mo vereva vara sava haʻai malepu natu, vao kalesia i pa tuenira, hijan haratu purongo mo lahi vahatelete, ale taunina mo jeu mo ngavulu limarave. <sup>10</sup> Haʻai atu tamlohi la lo vereva vara enia haʻai matea mo lo vai na vavahinau ʻuhu, ale vara te natuna, mo kilau mamahunira la mai la tavera, ale tarea mo avulahi vara i lo lavi na vinano la mai na imana, ale posina mo lo sile na oloolo isana tapuhi tinatinapua non God, mo avulahi vara i hoje na palora, ale mo tau na ʻomina vara i vai na

vavahinau ŕuhu tari.\* <sup>11</sup> O sopo uli na hija haŕai malepu la sopo vajiaha matan masalora mata lahi mo jeu na ŕomira vara la usuri Kŕisto, ale la pa rovo hinia matana. <sup>12</sup> Matana, talai i pa mai isara matan la tope na nora retitauhi isan Kŕisto vara la pa sopo mele lahi. <sup>13</sup> Mo sopo haratu purongo, pani la haŕai maloko vari purongo, la lo hahau ŕalihi na jara la vavano na ima tinatinapua matan vara la aleale retireti. Enira la sopo vai na posposi mata maloko vari purongo, la lo sorasora tamlohi, ale la lo tau na ngalsura hin te hinau mo sopo te nora hinau hinia, ale la lo vereea te hinau la sopo tataholo vara la verera. <sup>14</sup> Ale na lo vereea vara i pa mele ŕuhu jea vara haŕai malepu la sopo vajiaha la mele lahi, la mele vasusu moiso, la kilau mamahuni na imara, ale la sopo sile na masapa isan noŕa meresahi teni te masapa vara tea i retiŕeŕen hiniŕa matara. <sup>15</sup> Matan hai la vano la posi moiso, la usuri Setan. <sup>16</sup> Pani vara te haŕai rasua te haŕai malepu la lo toho na vaona, i pa lo kilau mamahunira vara la sopo tau na tetehi isana vao kalesia atu, matan vao kalesia la pa lo kilau la haratu la haŕai malepu varaŕuhu.

### *Volin Patu Tamlohi Rasu*

<sup>17</sup> Na tavaluna, patu tamlohi rasua la ŕuhu mata tiroma na vao kalesia, mo tataholo vara ha volira i vaha rua, sohen la haratu la lo voko ŕilangi na nora retivujavujangi peresi na vujangi. <sup>18</sup> Matan, Retitapu mo vereea vara, ‘Na rani buluk mo lo

---

\* **5:10:** Leon Greek mo vereea sohen harihi: vara mo hoje na palo tamlohi viŕoni. Mo vereea matan tuai la lo tau nora Sabbath na jingoima, ale posposi tataholo enia vara engko teni nom volitusi i pa hoje na palora.

savahi na patu wit, ha sopo lasi na jingona vara i sopo eʻi hani te wit makomo atu'. *Deut 25.4*

Ale mo mele vereea vara 'Mo tataholo vara tamlohi voko i lavi na volina'. *Lk 10.7*<sup>19</sup> Ale, o

sopo tapurongo tiroma isan tea vara mo tuvai na patu tamlohi rasua matea, pani vara tamlohi mo rua teni mo tolu, la levosahia mo řuhu vara tuvai atu mo tataholo, ale nake o eʻi tapurongo hinira.

<sup>20</sup> Vara te patu tamlohi rasua hatea mo lo usuri na nona hehe, o hapuhia na naho tamlohi rasua tari matan vara enira mo isoiso la pa matahu matana. <sup>21</sup> Na nahon God peresi na nahon Křisto Iesu peresi na angelo God mo viřonira, na lo sile

na retileu isam vara o taurilati la retileu tari sei na lo vereea isam vara o sopo opoi na tatuara purongo, ale o sopo vai te hinau na posposi tametame! <sup>22</sup> Ale

o sopo vilavila vara o tau na limam hin te tamlohi matan vara o tahea vara i vai na vavahinau non Moli, o pa levosahi mamahuni na posina tako, vara i vono engko o pa hase komoho na nona hehe. O lo toho na mauri vokeyoke. <sup>23</sup> Ale o

sopo inu na wai purongo, pani o lo inu na waen makomona matan pangem peresi na nom rojoa sei la lo toho isam. <sup>24</sup> Hehe nona tamlohi hai la

malue na jara tavera la tiromara na rani mata aria, pani te hehe nona tamlohi tinapua, la pa pala hitahu. <sup>25</sup> Mo sohen haratu isana vavahinau řuhu nona tamlohi, la memera purongo, pani vara la sopo pala tako, pani la pa pala hitahu.

## 6

### *Vavahinau Nona Slev*

<sup>1</sup> Haratu la rasua, pani la lo slev, mo tataholo vara la sile na oloolo isana nora tamlohi tatavera

tarea matan vara tea i sopo eři retisatihi na hijan God teni na vujangi řuhu. <sup>2</sup> Vara slev te nora tamlohi tatavera la vorai rasua, la pa sile na oloolo isara, matan enira la vorai rasua sohera, mo řuhu vara la vai na vavahinau řuhu isara, i jeu na tamlohi tatavera tinapua matan, enira la vorai rasua, ale God mo opoira.

*Reti Haluhalu Peresi Na Tavtav Varařuhu*

Timothy o vujangi la hinau sei isana tamlohi, o verea řilangi vara la pa oloolo hinira. <sup>3</sup> Vara tea mo lo vujangi te vujangi tinapua, ale mo sopo majinga na reti tataholo non nořa Moli Iesu Křisto, peresi na vujangi sei mo lo usuri na mauri God mo opoia, <sup>4</sup> tamlohi sohena, mo mangisi jea, mo sopo levosahi te hinau hatea. Mo opoia hajavua vara i lo sorasora hin te hinau tamlohi la sopo levosahia vara mo varařuhu teni mo vono, ale mo lo retireti na hinau matuvana mata vasi purongo. Posposi atu mo lo vaia mo vai na tamlohi la lo mereimerei, la patumasa, la retiřeřen, la řomřomi sati hinira, <sup>5</sup> ale tarea la vasvas peresi haratu řomira la lejileji, mo sopo te retivarařuhu hinira, ale la řomřomia vara posposi mata mauri rasua mo sile na masapa isara vara la tavgav, <sup>6</sup> varařuhu, posposi mata mauri rasua i pa vai na maurim i tavgav, pani isan la haratu purongo sei tarea la sopo řomusuri te hinau tinatinapua, <sup>7</sup> matan řa vora lekoleko na varama, ale vara řa mate, řa pa malue lekoleko. <sup>8</sup> Pani vara te hařa hanhani teni te nořa ruru, řa pa avulahi matara, <sup>9</sup> pani la haratu la opoia vara la tavgav, la pa jovi na hina vaihite, ale masalora mo lihora na hinau rongorongono vono peresi na hinau mata komora purongo, ale hinau sei mo putehi

na tamlohi na komokomo tavera. <sup>10</sup> Matan, opoia mata mania enia pulo hinau mata hina sasati tari. Matan masalo sohena, mo reve naʻihi na tamlohi hai na malele rasua moiso, ale la hase sarihira hin te rongosati matuvana.

*Isoiso Reti Non Paul Isan Timothy*

<sup>11</sup> Pani isam, tamlohi non God, o rovo hin la hinau sei. O tutungui na malele mata mauri tataholo, o tutungui na posposi atu God mo opoia, rasua, opoia, řomperavu peresi na řommalum.

<sup>12</sup> O vai na valum řuhu mata rasua, o taurilati mauri tui atu God mo toviho hinia, peresi taviti řuhu atu ko vaia na naho tamlohi matuvana. <sup>13</sup> Na lo vereia na nahon God sei mo lo sile na mauri isana hinau tari la mauri, peresi nahon Křisto Iesu sei mo vere na taviti řuhu mata retivararuhu na nahon Pontius Pilate, ale na lo vereia vara <sup>14</sup> engko o pa taurilati retileu nike, o sopo malue naʻihi hinia i tikeli rani atu Iesu Křisto nořa Moli i mele pala:

<sup>15</sup> na nona rani tataholo,  
     enia haratu mo avulahi mo tavera jea,  
 ale enia hasena mo aulu na hinau tari,  
     enia Supe nona supe,  
 enia Moli nona moli.

<sup>16</sup> Enia hasena, mo lo toho jejeu,  
 mo lo toho hin memera tavera atu  
     tamlohi la sopo eři mai mariviti hinia,  
 mo sopo lo tea i hitea,  
     teni tea i eři hitea.  
 Isana, řa pa sile na oloolo,  
     ale enia i pa lo tauri na suiha tui tui tarea.  
 Amen.

*Haratu La Tavtav*

<sup>17</sup> Isan la haratu la tavgav nake na varama, o vereia isara vara la sopo tau na řomira i sahe aulu teni vara la řomtoho na nora tavgav, matan řa sopo levosahia vara la pa toho i tikeli pangisa. Pani o vereia isara vara la lo řomtoho hin God hasena, matan enia mo lo sile na hinau tari isařa matan vara řa avulahi hinira. <sup>18</sup> O vereia isara vara la lo vai na hinau la řuhu, o vereia isara vara la tavgav na nora vavahinau řuhu, la pa hansohai, ale na nora řomavulahi la tatamahu vara la asease na nora hinau. <sup>19</sup> Hin malele sei, la lo takonahi na tavgav tavera matara hasera, sohena pulo řuhu matea matan mauri atu mo lo mai, ale o vereia isara matan vara la eři taurilati mauri atu, enia mauri vara řuhu.

*Isoiso Reti Non Paul*

<sup>20</sup> Timothy o matahi la hinau sei God mo lo silea isam moiso. O sopo usuri na sorasora vono teni te řomřomi sei la vereia vara enia 'hina lelevosahi' <sup>21</sup> matan tamlohi hai la lo turu hinia la lo vano malue na malele rasua moiso.

Noku usiisi vara řomřuhu non God i pa toho isamim isoiso.

**Tangoa New Testament**  
**The New Testament in the Tangoa Language of**  
**Vanuatu**  
**Le Nouveau Testament dans la langue Tangoa de**  
**Vanuatu**

copyright © 2010 Wycliffe Bible Translators, Inc.

Language: Tangoa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 22 Feb 2024 from source files dated 31 Aug 2023

89356e5c-df58-558e-9b27-ae0321adb2df